

牧齋初學集

五

牧齋初學集卷第七十一

傳二

朱鷺傳

朱鷺字白民吳縣人也少有俊才事馮祭酒亭
禎爲高足弟子家貧教授生徒以養父母承顏
順志以老萊子爲法牀頭恒貯數十錢曰買笑
錢父死久之乃謝博士弟子芒鞋竹杖獨游名
山所至畫竹以自給不受人一錢嘗游華山登
天井黃縉道服長髯等身見者皆以爲仙人也
少好玄學解道德參同之旨晚棄而歸禪叅雲
棲慈山二老結茅華山寺之左蓮花峯矗立其
前若相向拱揖欄檻之下萬木如笑可俯而掇
也晝夜六時偕山僧炷香念佛崇禎五年年八
十作辭世偈沐浴更衣而逝其孫旦葬之山中
在巢松法師塔左爲說者曰中吳在勝國時多
憤世肥遯之君子若翼聖子鄭所南其最著者
聖子善畫馬室無几席命其子伏榻按背伸紙
作唐馬圖人輒以數十金易去藉是故不饑所
南畫蘭不肯布地自贊畫像曰懸其頭於洪洪
荒荒之末爲不忠不孝之榜樣其託寄卓詭如

此鷺爲諸生當萬曆全盛之世每譚建文朝事
輒泣下汎濶悲不自勝不知其何謂也網羅遺
佚作爲建文書法欲進之朝不果崇禎初撰井
露頌策蹇入長安侑以畫竹欲獻 新天子又
不果虜薄城下或勸之亟歸慨然歎曰莫非王
臣也其敢逃乎端坐龍華寺注般若經寇退而
後反斯所謂隱不忘君者歟原其初心亦有意
於斯世託而逃焉者歟鷺之畫竹與聖子之馬
所南之蘭並傳於世後之君子當有見而知之
者余故爲之傳無亦使其無傳焉

徐霞客傳

徐霞客者名弘祖江陰梧棲里人也高祖經與
唐寅同舉除名寅嘗以倪雲林畫卷債博進三
千手跡猶在其家霞客生里社奇情鬱然玄對
山水力耕奉母踐更繇役感感如籠鳥之觸隅
每思颺去年三十母遣之出游每歲三時出游
秋冬觀省以爲嘗東南佳山水如東西洞庭陽
羨京口金陵吳興武林浙西徑山天目潮東五
泄四明天台鴈宕南海落迦皆几案衣帶間物
耳有再三至有數至無僅一至者其行也從一

奴或一僧一杖一襍被不治裝不裹糧能忍饑數日能遇食卽飽能徒步走數百里凌絕壁冒叢箐扳援下上懸度屢及捷如青猿健如黃犢以峯巖爲床席以蹊磳爲飲沐以山魅木客王孫獲父爲伴侶僂僂粥粥口不能道詞與之論山經辨水脉搜討形勝則劃然心開居平未嘗軍悅爲古文辭行游約數百里就破壁枯樹燃松拾穗走筆爲記如甲乙之簿如丹青之畫雖才筆之士無以加也游台蕩還過陳木叔小寒山木叔問曾造鴈山絕頂否霞客唯唯質明已失其所在十日而返曰吾取開道捫蘿上龍湫三十里有宕焉鴈所家也板絕磴上十數里正德閒白雲雲外兩僧圓瓢尚在復上二十餘里其顛置風通人有麋鹿數百羣圍繞而宿三宿而始下其與人爭奇逐勝欲賭身命皆此類也已而游黃山白岳九華匡廬入閩登武夷泛九鯉湖入楚謁玄嶽北游齊魯燕冀高雒上華山下青柯坪心動趣歸則其母正屬疾嚙指相望也母喪服闋益放志遠游訪黃石齊於閩窮閩山之勝皆非閩人所知登羅浮謁曹溪歸而追

石齋於黃山往復萬里如步武耳縣終南背走峨眉從野人採藥栖宿岩穴中入目不火食抵峨眉屬奢酋阻兵乃返隻身戴釜訪恒山於塞外盡歷九邊阨塞歸過余山中劇談四游四極九州九府經緯分合歷歷如指掌謂昔人志星官輿地多承襲傳會江河二經山川兩戒自紀載來多囿於中國一隅欲爲崑崙海外之游窮流沙而後返小舟如葉大雨淋濕要之登陸不肯曰譬如礮泉暴注撞擊肩背良足快耳丙子九月辭家西邁僧靜聞願登難足禮迦葉請從焉遇盜於湘江聞被創死函其骨負之以行泛洞庭上衡嶽窮七十二峯再登峨眉北抵岷山極於松潘又南過大渡河至黎雅登瓦屋驪經諸山復尋金沙江極於犛牛徼外繇金沙南汎瀾滄繇瀾滄北尋盤江大約在西南諸夷竟而貴竹滇南之觀亦幾盡矣過麗江懸點蒼雞足座靜聞骨於迦葉道場從宿願也繇雞足而西出玉門關數千里至崑崙山窮星宿海去中夏三萬四千三百里登半山風吹衣欲墮望見外方黃金寶塔又數千里至西番參大寶法王鳴

沙以外咸稱胡國如述盧阿耨諸名縣旬不能悉西域志稱沙河阻遠聖人馬積骨爲標識鬼魅熱風無得免者玄奘法師受諸魔折具載本傳霞客信宿往返如適莽蒼還至峨眉山下託估客附所得奇樹虬根以歸并以遡江紀源一篇寓余言禹貢岷山導江乃汎濫中國之始非發源也中國入河之水爲省五入江之水爲省十一計其吐納江信於河按其發源河自崑崙之北江亦自崑崙之南非江源短而河源長也又辨三龍大勢北龍夾河之北南龍抱江之南中龍中界之特短北龍抵南向半支入中國惟南龍磅礴半宇內其脉亦發於崑崙與金沙江相竝南下環滇池以達五嶺龍長則源脉亦長江之所以大於河也其書數萬言皆訂補桑經鄭注及漢宋諸儒疏解禹貢所未及余撮其大略如此霞客還滇南足不良行修難足山志三月而畢麗江木太守倚饌糧具筍輿以歸病甚語問疾者曰張騫鑿空未覩崑崙唐玄奘元移律楚材銜人主之命乃得西游吾以老布衣孤筇雙屨窮河沙上崑崙歷西域題名絕國與三

人而爲四死不恨矣余之識霞客也因漳人劉履丁履丁爲余言霞客西歸氣息支綴聞石齋下詔獄遣其長子開關往視三月而反具述石齋頌繫狀據牀浩歎不食而卒其爲人若此梧下先生曰昔柳公權記三峯事有王玄沖者訪南坡僧義海約登蓮花峯某日扁山趾計五千仞爲一旬之程既上燐煙爲信海如期宿桃林平曉岳色清明佇立數息有白煙一道起三峯之頂歸二旬而玄沖至取玉井蓮落葉數瓣及池邊鐵缸寸許遺海負笈而去玄沖初至海謂之曰茲山削成自非馭風馮雲無有去理玄沖曰賢人勿謂天不可登但慮無其志爾霞客不欲以張騫諸人自命以玄沖擬之竝爲三清之奇士殆庶幾乎霞客紀游之書高可隱几余屬其從兄仲昭讎勘而存之當爲古今游記之最霞客死時年五十有六西游歸以庚辰六月卒以辛巳正月葬江陰之馬灣亦履丁云

萬壽師傳

君名國樞字環中江西南昌人也祖安禮兵部左侍郎諱恭之少子少而好道習符法鄉人有

爲狐魅者往幼治之狐盛車騎迎入高門雜然相詆訶乃握掌默運雷訣須臾雷震羣狐死大樹下既沒道士上章見之於天樞院掌牋奏今醮壇稱廣惠萬真人安禮生鳴宇以舉人知馬湖府君之父也君聞其祖上昇慨然有志於真靈之業祖母劉病臥見兩鬼捧矢於膝呼暴欲死新建人聶紹真爲禳奏降天將於童膝膝中矢出之病立差紹真故田家子傳異人符法建玄應壇扣請經年乃授以立獄治病祈晴禱雨五雷斬勘之法爲奏名授天師法錄天啓元年馬湖公遇齋會之難自投於水聶啓醮追薦公降於家僮備言死事狀且言賈人負我金若干有簿籍在某所賈人懼服不敢抵諱一錢免喪之長安出游真定東海生之繼室絃服而立於門見紅衣少年報而趨入則已據其寢矣少年能變形爲生言笑舉止無異所習經書及鎖闥文卷背誦如流變異百出檄召天將與戰截其屋角有狐逸去已而復來君方禹步畫符狐爲好女子裝束跋紅鞋可三寸許踞坐屋梁呼君小名數其少年冶游事曰若亦豈木石人哉何

爲難我君怒嚙指血召關鄒二帥與戰又引去夜有兩目見臥床巨如車輪從行者寒噤膚栗護之竟夕乃舍而之高邑禱雨治狐於郭大理家復返真定乃依聶所傳立鄧都獄獄開八門關帥主之韋劉王孟車夏劣桑八帥分守之韓帥統天兵討捕三七日有三老狐五小狐反接自繫刺其皮而亨之凡七月而妖息先是郭大理之子欲使野狐明燈設席召十狐擇其惠黠者而使之一狐僇惡可畏郭心悸遣之不肯去却相惱亂晉人郭雨師多奇術能禁箬於空中厭効不能絕甫移牒城隍卽逐去君嘉其能而怒真定城隍之不職也遂上章行舉効法狐笑曰城隍効去竟內虛無神是代吾出力也屢上章牒皆被邀奪比新神受事乃伏誅凡人竟禽詰妖邪斬勘鬼物皆先牒城隍神取進止按治不效繼以彈効其得以制令神鬼符到令行多用此也安肅李氏女被魅設壇下將以訊之一人突入門踉蹌狂舞旋出門拱立若有所須有聞從道左揖一人入其人容止甚莊儼然南面坐揖者握衣就東面坐呼老真人罄折言曰王

善白事魅已得期三日現形復揖而送之越三日旋風中有物下墜則攢帚也折之鮮血隨手噴出魅乃絕靈壽邨有婦采桑美少年趨而拱揖旦旦不止叱去之棒朱提以獻爛然堆盤歸而語其姑姑心動令携之以歸迨暮登床少年已褰被宿相黜七日夜藏悴垂死牒城隍弗應遣靈官糾罰迅雷擊神像之半命將吏械繫之乃來告曰力小不能制請於關帥可也具牒焚壯穆祠下壯穆示夢曰妖在舍北大樹下質明掘樹有大驢僵臥毛色黯黑有光目睛轉動迎風而輒遂擊斃之深州崔氏婦宵花夜飲遂得感疾向晦而疾作切切如與人昵語撒天將考治數日康帥來告請往巡崔婦臥室床頭置牙刻像設有爲呂仙形者視之有異畫符以鍼刺其首婦遽呼頭痛曰是矣斧劈之牙像中精液盎然焚之而絕有神降於藥城劉氏冠服乘車從空下自呼城隍謂主人明年元日天仙將下娶君女命我爲媒元日將且空中懽懽鼓樂擁八人與一少年可十六七許我冠蟒衣降與主人女爲昏促數往來儀仗一如初降時主人聞

行告君君懸幡於其庭王帥現身結幡幡脚蟲如金鞭妖復列仗而來幡自舉擊之須臾有甲蟲墮地大如甕蓋隣里皆竊笑此女女慙自縊而死丁卯十月入蜀慟哭於馬湖公投水處登峨眉山遇紫雲盧先生於文杏閣捫衣掃除服事浹月乃授以薩真人神霄青符五雷秘法及斗母月字爭龜鍊度擒邪伐廟之訣將行出漉囊金以贈且曰子第去將復返戊辰三月之楚有馬全真者備衣苴履乞食湖湘聞目君而問曰子從峨眉山老人來耶君語之故馬曰悉清則符靈派清則法靈子傳法而不傳派其猶未也乃擔簦而反先生迎笑曰吾固知子之欲返也筮日主壇昭告於薩祖立爲十七代嗣法嗣孫執血書盟以度世弘濟萬誓凡有章醮得自拜家書刺指血爲符以上薩祖稱家書者僧人問子孫申白其祖父之云也往山西訪郭雨師道經紫陽縣墟落中神廟歸然登其樓床帷鏡奩畢具怪而問之鄉人竊告曰此吾天帝也女子必先薦枕席乃敢出嫁否者災禍立至君怒曰小邪敢爾寡少壯數十人往誅伐之屋瓦橫

飛人莫敢近鄉老共追逐曰何物野道士怒吾天帝還入廟拒門而寢用五雷鐵確符伐之自辰至巳廟屋火起焚燒立盡鄉人遮道呼神人乃更衣而遁已巳十一月之金陵劉氏婦臥床三年有物憑之人往覘視輒被捶擊愾溫帥考之帳中金鞭割然婦立起次日泮其相衣有朱書淫鬼害人今斬訖七字鬼血殷然明年聞三吳大旱往祭之乃治妖於松江朱氏娶巫戈姓者能禁人生覓收召考係朱生與宗人有讎請巫禁之男女八口竝時狂易摧塌窻格毀敗什物便溺床席污穢龜黼時復梓頭縣地刀杖毆擊如是者一年君入其門皆蒙頭匿被中俄而叫噪跳跟裸露奔軼君詣城隍廟考驗將奏劾焉神告期以五日八人者忽忽遽歛容盥沐霍然而起皆言囚繫黑獄中鬼怪逼迫鎗矢攢射牽頓舁曳不知所爲忽有人怕頭袴靴自稱朱將軍破械出之乃得返耳巫反縛呼服自首郡守前曰厭朱氏者我也守杖而逐之先是嗣天師張真人入覲過吳朱再通狀往訴真人曰非萬法官不能治也朱是以來請君在真定効狐

數上章虛靖天師虛靖至今靈響不絕默有啓告嗣天師以是知君宋氏舉家病疫其次子且死君行持默運有閒死者軟獻流涕欠伸而蘇一家百餘口皆起宋謾言曰吾子自不死耳齋醮未竣縱觀者笑言挑拌以示慢於神無何家衆病復大作要令更設齋醮泥首囚服反接投地以謝罪然後良已明年海上大疫死者相枕建醮禳解野田中鬼燐如聚螢七日而疫息嘉定侯少卿之長孫年十五病中見美婦遂與游處者三年婦曰十七姐侍婢曰曼仙阿絳輩數十其游歷皆仙都最勝者上清閣雲來洞白雲池其所赴法會曰雲都曰靈寶曰清福其所傳授曰靈山大師還丹法光陀大師取寶法皆靈符祕文久之少婦赴光陀法會繼之者凌家處女也其家請君劾治十七姐亦來笑曰萬法官其如我何君設壇禮斗凌女亦設壇於池西臺上玉女廟中除地設幡按五方八卦二十八宿壇外列天將四金甲神四十二甲將領牒稍遲凌女命金甲神揮刀斬之凡七七而旱君復行翻壇法二女皆至告別曰吾與汝入天宿緣

非彼所知也。自是遂絕其幼孫。見三眼怪爲祟。足委坐如解。爲請雷立獄。并劾爨婢爲五郎神。魅者青天無雲。雷聲訇轟。逸其宅。幼孫夢三眼怪。偕兄弟五人置酒痛哭。而別婢。初見神冠服。呵數越三日。囚首械繫。哭而言曰。爲法官所劾。流遠方矣。君言五郎神者。五行之餘氣。叢祠荒邱所在有之。憑依爲孽。每牒付城隍決遣。不足煩考治也。滁州氓柳某女。未笄而美。有妖欲取之。附耳而語曰。以若女子。我不然。吾能使若女不嫁。且大困。若柳不應。自是行媒議昏。輒有蜚語。敗其事。數徙居。數見逐於主人。翁皆妖所爲也。行乞至松稅破食。以居。妖復語曰。若今已重困乎。何爲不出口許我。柳固不肯。應化爲蟲入其耳。往來噴噪。穿穴腦髓。日夜號呼求死。君家王帥符授其妻。令塞兩耳。痛少差。柳夢妖爲一男一女泣而言曰。相隨十餘年。法官欲逐我去。將從此辭矣。然悉宰兩耳中。不肯竟去。君怒責城隍甚峻。城隍曰。彼以耳爲窟穴。禽之不能擊之。不可盡教。王帥好言誘由之。許以不死。手君如其言。有大蜈蚣出左耳。其女擊殺之。妖復往。

辭城隍曰。我固不死。幸語萬公。勿窮追我。亦竟不知爲何妖也。王解元獻吉妻病死。君爲設醮。憑老蒼頭語二子扶膝婢之不度者。三七日夜。向午室有風肅然。二子見其母從壁道中冉冉出。處分家事。指某物在某所。纖悉如平生。家人伏聽者環之。而泣良久。乃去。顧生父死將闔棺。冀得招魂相見。如王氏。媼君爲推所生時。日曰。是且未死也。掃室墮戶。熾炭盛水。北牖各一。南戶七。中央五。東西壁掛桃柳枝七枝。硃砂塗之。被髮衣皂衣。袒臂赤足。飛神訣誦神呪。越兩時。棺中大呼曰。出我出我。壬申夏三吳復旱。崇於上海嘉善嘉興湖州皆大雨。在嘉善雨既降。道流竊語曰。有雨而無雷。何也。君方持請雨。勸合未及焚雷神。就其手掣去。震電燁燁。遠壇旋擊殺邑令。所枷謗法者。跪三日。不仆。余嘗從容問君以幽冥鬼神之故。大抵本天心。持斗訣物怪人妖。生期死限。無不洞若指掌。其自治用感應篇條例。其治人用太微功過格。其治神用女青天律。治鬼用酆都黑律。劾妖鬼不効。冤鬼祈子嗣。不祈官位。分別人鬼。整比法錄。遇惡孽善拔。

幽渺明蓋其誓願也君在吳中流聞敕勅神異就其人證明之皆可信不誣遂并按其所籍記者詳次於篇贊曰昔盧靖天師沒後十六年西河薩守堅遇之於青城山遂相授受所謂薩真人者也君得法於峨眉嗣薩祖而虛靖冥通證明元世祖謂天師之印劍有神明相之豈偶然哉高皇帝卽位首崇正一封號而周玄初鄧仲修咸得召見此皆上述老子下襲張陵有功世教者也儒者不察猥與李孜省陶仲文之徒同類而稱之豈不繆哉余故排纘爲傳俾後之傳方伎者采焉

王淵生小傳

王淵生陳姓名三恪年十八代其父教授生徒樞丞丞丈稱爲大師蚤夜力學火燃中角燎及髮鬚煙焰蓬蓬然猶吾伊弗輟也精研訓故博綜小學堪輿卜筮壬遁風角家言嘗游京師過益津有異風從北來生筮之曰國其有大火乎又當有大喪未幾乾清坤寧兩宮災仁聖皇太后賓天天啓中私告所知曰歲丁卯聖人龍飛國家鼎革水火薄射其猶剝復之交乎

已已虜薄都城余爲生筮曰虜當自退本兵邊撫將不免後皆如其言江陰議建塔君山爲賦以道其形勝卽席榮翰文不加點纓當時尹孔昭皆歎服焉邑志之不修者百年矣刊編鑑翰街談里語摭摭收并旁行側注久之成書名曰海虞別乘多所援摭是正雖通人無以易也卒年七十有七贊曰生嘗爲余言唐人歌詩皆可被管弦先輩知音律猶有歌唐詩以行酒者因歌樂天清江一曲之什鼻觚牙豁聲從齒縫中出嗚嗚然如發蚓竅坐客皆目笑殊自得也每別必執手誚談曰公必傳我余故焉之傳邑里之志耆舊者或有取焉

牧齋初學集卷第七十二

傳三

瞿元立傳

公諱汝稷字元立吳郡之嘗熟人也以父文懿公任爲郎累官長蘆都轉運使詔加太僕寺少卿致仕公娶徐尚書之女文懿公之喪三年不入內徐有通問之奸公叱去之尚書聲勢烜赫郡邑吏承奉風旨脅持萬狀親知故舊交關游說公屹不爲動則養死士遮道刺公黃金白刃交錯衢路覆巢毀室命在漏刻公廬於文懿之墓明燈讀書門閤不閉指墓前宰木以誓曰此吾死所也一日持平交刺謁尚書踞客座尚書厲聲詰問生自念亦有所悔乎公仰而應曰悔不能刑於寡妻至於兄弟尚書默然而止筮仕得臺府散僚廉辦持大體軍餉自府幕給發有入官嘗例錢公在中軍府悉謝去已稍遷左府故事中府都事出軍士跪逆諸途它府則否軍士之跪逆左府自公始也同官與豐城侯爭禮執政右豐城公取永樂中儀註以進執政莫能難扶溝令以扶宗人被逮嚴旨下部議公爲

刑部郎當具讞請于尚書曰宗人安得佚宗正降微服入今庭令自扶扶溝民耳何罪讞上令得釋南轡部爲奸商窟穴興作輒倚辦商冒破金錢無算公請用兩關權木權木不至朽蠹而商不得此而爲奸權龍江關與陳御史共事美輒悉歸公帑南都人爲之語曰長御史怕短主事蓋公狀短小故云而陳御史者乃益盛稱公爲言于大司空朱公遂用推擇爲黃州太守公生平念任子一途在于綺襦執紼之間非國家所倚重而其人亦鮮激昂感繫如長沙黃巖者奮欲一洗之中更家難益自刻勵服官南北投分皆海內名士志節慷慨相與引重而公又嫺習吏事潔身修行歸本于實用以一任子居閭曹人望之如鉅公長者云而黃故羯獍好訟公謝絕請託手削爰書大聲誦之琅琅徹堂下訟者叩頭服罪傳相教厲詞訟衰止嘗爲詩曰訟庭橫高霞質成澹無事蓋其治狀若此麻城令不善事上官御史欲彈治之公爭之強遂并鐫責公無何徙治邵武中貴人括稅者移檄八郡用監臨體公爭之不得遂移病歸卽家拜辰州

太守湖南上官未順彭元錦最強與酉陽冉御龍相離殺而保靖彭象乾者御龍之出也象乾失愛于其父欲立其弟象坤元錦助象坤聚兵逐之事久不解公移檄諭元錦曰竊聞宣慰悅禮樂而敦詩書數奏膚公不自矜伐苟循是道先兄林世麟之賢聲可跂而及也乃以挾立彭象坤一事噴有煩言夫立後自有成法撫按司道諸臣孰肯從宣慰而素國家之法耶宣慰世受爵封耳目綦聲色口體綦甘適指揮進退罔不如意三州六司之人豈盡勇力才諳不逮宣慰而僂首聽服哉亦恃國家之法耳終身覆幬國家之法而不知法之覆幬我是猶魚之在水而不知水之生我也魚不知水之生我蕩而失水則雖有鱣鯨之力且制于螻蟻矣人不知法之覆幬我縱而敗法則雖負富強之盛且罹于僇辱矣宣慰自恃富強謂朝廷莫如我何宣慰自計孰與寧夏之唃與播之楊氏哉唃拜以降胡數立戰功歷位總戎遂有驕色既而鄭經略行邊以其子承恩隨軍承恩視邊城諸軍皆出其下歸益驕先是歲一日有雀集拜之左肩

旋而右繞者匝匝凌雲而翔拜喜語人曰煙霄退舉此其徵乎及寧夏兵亂衆欲推拜父子則先歲雀翔之日也于是乃逐亂軍為變寧夏城與虜僅隔一後衛守後衛者為蕭如薰楊司空之婿也狀貌如婦人女子拜遣驍將唃雲佐攻之楊司空女力贊其夫誓以死國如薰鼓勇而前以一天斃雲拜為奪氣拜父子卒就屠滅雀集之祥可知已矣以拜之強倚北胡之援而一在弱少年與一單帷砥室之女子竟能當先而挫其銳天下事何可易量乎宣慰之強不過唃拜敵國之援不如強胡職司楚地者又豈乏一弱將一女子哉竊為宣慰危之也唃拜事尚在北隅播州之役宣慰嘗馳兵而與之角矣往者萬人喪者八千蓋十不存二其強豈後宣慰播地之險且廣又孰與未順也安疆臣九域土司之冠也以女女應龍子豈不念其親姻而從大軍共滅應龍計一失足於應龍且與應龍同禍故忍情決愛以圖自保也今宣慰覺端尚淺翻然知悔白圭可全若不良圖而遂巡護前噬臍無及竊為宣慰惜之且宣慰所以甘心象乾不

利其立者以象乾酉陽所自出慮其合而厄我也宣慰一出師而象乾僅以身免酉陽疆土亦日感其無奈宣慰何亦已明矣重虞易與之鄰國而忽視不可干之國典不亦異乎昔尉佗決計于陸賈而彭寵失聽于朱浮豈賈浮之言有善不善哉兩人之聽異也宣慰誠能聽本府之言尊國家之法保靖立俊一從漢法請力任其無咎不然宣慰所樹碑家廟以播事垂戒于孫後事之師豈遽忘之也元錦捧檄泣曰太守生我矣遂解兵去不敢遂象乾而元錦所題詩句流傳巫黔閬語頗不孫又匿彭勉忠數人不聽出當事者欲窮治之公謂元錦用命不用命關係國體詩句有無不足問彼既用命又欲窮治其用事之人恐威損而法不行管仲相齊下今于流水之源令下而不察下之所未必從非行今之術也後先奏記數千言保靖未順酉陽三司事乃大定亡何勦紅苗之議起公上議兩臺曰苗地接楚蜀黔三省當楚蜀者晏然無事寇盜竊發卒歲不過一二舉黔視楚蜀多苗警邏年頗寧息今茲之釁實起于黔總戎陳璘蓋黔

有食糧熟苗龍惠大種苗也居小橋頗為部落所歸中國羈縻之假以指揮服色總戎初至遽革其糧苗警日起總戎以為皆惠也二月總戎使健步王仁續至惠寨仁續淫苗婦惠并苗婦殺之白狀于總戎總戎誘惠殺之盡滅其家五月復殺其弟富失漢法民姦人婦女者并殺其婦則勿問惠故奉漢法也又以白總戎何至殺惠而滅其家乎釁起如是曲在我矣奉詞討之不亦難乎據沈洋之疏謂其地徑不過百三十里則自方四計之五百二十里圓三計之亦三百九十里況其地勢與南越同真有如劉安所稱山川要塞相去寸數而間獨數百千里者未可以幅員程計者乎四五百里之內其人奚止數十萬上下山險若飛履茨棘嶄岬跳躍如猿猱方跳躍時以一足蹶張背手傳矢往往命中掉鎗以衛弩執弩者口銜刀而手射人度險能整退必設伏此苗之長技也而其性好獨居阨守不能遠攻今若盡殲其類則彼將聚而牧死禽長無樂生之心部落有必死之志以數十萬之衆據四五百里不可測識之山川我未可以

速得志也我國家征苗之師宣德六年興師至十二萬而都督蕭綬最稱勇略殺師池河入苗心腹之地也田藝圃以示久畱諸苗震悚綬受降設堡而退正德之師二萬三千嘉靖中興師如正德之數既復益萬餘而殺傷亦略相當國家之不盡殲苗也亦愛苗而不攻乎抑亦窟穴遐僻道路阨塞未易窮討乎 二祖創業垂統凡夷漢雜居之郡縣必名之羈縻蓋取漢虞詡之言欲臣子顧名思義知懷柔撫綏之道也今乃橫席中國強大興無名之師括抒軸皆空之財供粗練不貲之費勞瘡痍未復之衆攻往古不臣之夷苗之所結怨一人我之所騷動三省背 二祖之訓貽兆姓之憂失策甚矣焉今之策惟令各哨堡傳諭苗長其不願助龍氏爲亂者人自首與之割諭以攜其黨而誅其不用命者苗自縛渠魁以獻餘悉赦勿問即使一偏裨提千若百人往足辦矣不然黷武興戎兵連禍結國家之患吾恐其自勦苗始也議上事得寢溪峒蠻夷難擾易亂不當以漢法治之流官治夷又不能 切循漢法生蠻夷心而卒以糜

弊國家未順紅苗兩役微公其不爲播事者幾希公以一郡守削赤一牘再弭疆圉大故曲突徙薪之功世故罕有能明之者也貴陽按臣欲以四衛屬黔及復設沅州總督川湖貴都御史公條上其不可狀公守辰猶能抗國家大議以郡守譏駁御史去今才十年餘耳長蘆鹽政日弊公以都轉運使往治風清弊絕汰潞藩食鹽之艘錫商人落地之稅皆與中涓文移往復力陳利害乃著爲令歲大侵議興工作沒刊國濠六十里興國河八里事舉而民不害是歲上計京師舉清廉異等庚戌春病甚上疏乞骸骨卒於滄州之官舍福清葉公聞之亟言於銓部覆請如少卿致仕公熟習國朝掌故畱心於人才政術自分宜江陵以來朝者變更黨論錯互抵掌而談若數一二居恒謂代無全人人無全是黨人無補於漢世而宋賢有辜於新法其所與游多當世名士以道學氣節相題目者然公之持論若此於書無所不闕考訂異同叢疑躊駁援據蒐討不窮極源流不已博綜釋典酷嗜宗門諸書手撮其玄要者爲指月錄自言每一點

筆如一餅一鉢從諸耆宿於深山古木之間其樂無以逾也痛疾狂禪於顏山農李卓吾之徒昌言擊排不少假易中哭管登之先生講三教合一之學公納履稱弟子晚而與先生論學則曰無問學儒學佛學道苟得其真不妨換作一家貨否則為三脚貓終無用處先生表章石經大學公考覈為偽書作質疑以正之曰不直則道不見弟子事師當如此也公少好辭賦遭難時作松聲賦以自廣邵武歸作武夷雲鶴二賦為時所稱五言選體及佛乘碑版之作尤富合集十四卷贊曰公嘗效鮑明遠作行路難十八首其自序曰少侍先文懿遊兩都長罹多故既以下察服政中外預聞游世得失之端滿峻之隱請骸未遂閑閣多暇言念昔吾真遊羿之彀中乃今謝事可幸免夫援筆寄感遂如鮑章數讀公之詩與其所以自敘者文人之心與勞人之志其可以想見已矣公嘗語余古今政治名實參半如朱子嘗平倉亦虛名鮮實用欲論著之未果余為公傳述其論永順紅苗事詳著於篇俾後世得以覽觀焉

顏仲恭傳

顏大韶字仲恭嘗熟人也父雲程神廟時為南京太嘗寺卿仲恭與其兄大章字伯欽學生子也連袂出游人不能辯其少長有張伯皆仲皆之目伯欽舉進士奉使休沐顏面膚腴衣冠騎從甚都仲恭老於書生頤蓬不櫛衣垢不澣口不擇言文不擇人潦倒折拉悠悠忽忽每引鏡自詆曰顏仲恭乃如許仲恭少治詩義專門名家竟陵鍾惺定為本朝第一長益肆力於學問六經諸史百家內典之書靡不亂其津沙啓其鈴鍵而其所沈研鑽極者詩經三禮莊子也其讀書也一覽即了大義通明指歸又不憚穿穴訓故用以會粹異義剗削隱滯一以為通人碩學一以為老生宿儒蓋兼而舉之也其論詩以為詩有齊韓魯三傳毛傳出而三家廢鄭箋時與毛異唐宋諸儒多與毛鄭異朱子盡掃毛鄭槩以鄭衛為淫風世儒皆知其繆其尤踳駁者則不取義之興也既不取義矣又何興乎又有全不會小序之意妄自刪改者伐木之序曰燕朋友故舊也自天子至於庶人未有不須友

以成者此篇乃答上篇棠棣之意雖燕親戚而以朋友爲重棠棣譏雖有兄弟不如友生此言人不可不求友生至於父舅兄弟亦當以酒食相親洽也朱子取小序首句而刪去下二句則直以父舅兄弟爲朋友矣其可通乎鴛鴦序曰刺幽王也古之明王交於萬物有道自奉養有節焉朱子直注云鴛鴦于飛則畢之羅之矣君子萬年則福祿宜之矣夫鴛鴦之羅畢羅此豈吉祥善事而以興人主之福祿乎此二章乃一正一反以爲諷諫于飛則畢之羅之在梁則戢其左翼明動者之有災靜者之无咎也周自昭王南征而不復穆王西征而徐叛自此以還以巡狩爲危事故卜征五襲吉而後行此所謂交萬物有道而詩人以爲諷也正與魚藻王在在鎬飲酒樂豈同義一吟詠而知非盛世之詩矣此之不解豈所謂以意逆志者乎今欲刊定一書當用毛傳爲主毛必不可通然後用鄭毛鄭必不可通然後用朱毛鄭朱皆不可通然後網羅羣說而以己意衷之嚴粲詩緝作於朱注之後獨優於諸家而大全之作敷衍朱注一無發

明用覆轡可也其論禮記謂自宋以前爲禮經之學者惟知有鄭注孔疏康成以耆德雄辯壓折千載頴達依阿其旨無所是正自宣和有好古之士于是三代器物閒出於墟墓伏匿之中學者援以證漢人之多謬而陳氏之集說出焉朱有集說以前學者之患在于疑而不能明既有集說以後學者之患又在乎明而不能疑不可以不深維而自得也其論周禮則地官之原隰羸物小司徒之上中下地以及鄉師鄉老州長之名秩春官大宗伯之天產地產春官之世婦夏官馬質之甸內外司燿之出火內火冬官之量豆稊案以及匠人營國皆援經據傳考古徵今以訂補注疏之疏闕而小戴記是正者尤多其辨五帝世繫曰康成千載儒宗而惑溺緯書王肅引經據傳用以難鄭惟五帝世繫則康成紉史記本紀而取春秋命序曆最爲有見王肅據家語五帝德以闕之斯爲繆矣五帝德篇太史公採爲本紀謂黃帝少典之子也正妃嫫祖生二子一曰玄囂是爲帝嚳高辛氏之祖二曰昌意是爲顓頊高陽氏之父帝嚳生堯及

稷契顓頊生鯀鯀生禹自黃帝至禹皆同姓而異其國號夫三皇五帝之事若存若亡詩書之傳所不載聞可推尋則必於左氏內外傳求之左傳郊子之言曰炎帝以火紀故爲火師而火名黃帝以雲紀故爲雲師而雲名少昊氏之立也鳳鳥適至故爲鳥師而鳥名自顓頊以來乃紀于近縣此言之則少昊在黃帝之後顓頊之前明矣今本紀五帝不數少昊而直曰黃帝崩其孫昌意之子顓頊立則將置少昊于何地乎或又曲爲之說謂少昊卽玄囂玄囂號曰青陽而少昊號曰金天迥然有金木之別其非一人可知且玄囂若立爲帝豈容降居江水或又曲爲之說謂少昊卽少典如是則反爲黃帝之父矣黃帝與炎帝戰於阪泉克之而代其位何容炎黃之間更著少昊其必不然者一也孟子曰天下之生久矣一治一亂五百年必有王者興左傳曰九州之險是不一姓此乾坤消長剝復自然之理也少昊氏之衰也九黎亂德顓頊乃命重黎絕地天通顓頊氏之衰也共工氏霸而不王帝嚳伐之而序正星辰皆其子孫失德衰

敗而異姓代興若黃帝之後卽少昊少昊之後卽顓頊顓頊之後卽帝嚳數百年嘗治不亂則九黎共工安所廁足於其間其必不然者二也古者帝王革命必改正朔易服色殊徽號異器用繼世而有天下則否若少昊顓頊帝嚳親爲黃帝之子孫而儼然革命更姓改物視其父祖如興王之待勝國則悖德已甚矣其必不然者三也凡左氏所云高年氏有才子帝鴻氏有才子者皆歷代帝王之苗裔耳受氏之後雖數十百世亦曰某氏非必指其身也而讀者不察以鯀爲顓頊之親子以稷契俱帝嚳之親子于是竹書紀年謂鯀一百九十歲而誅推其受命治水之年蓋已一百八十一矣堯之禪舜舜之禪禹大約在九十九左右寧有一百八十方膺重任者八十九十曰老有罪不加刑焉寧有一百九十而置大辟者堯未舉舜之先書稱百姓昭明庶績咸熙稷契果親弟八十年而不知堯豈若是之愚而羲和四岳諸臣蔽賢焉若是哉其必不然者四也命序曆之言曰炎帝號曰大庭氏傳八世合五百二十歲次黃帝一曰帝軒轅

傳十世一千五百二十歲次少昊曰金天氏即窮桑氏傳八世五百歲次顓頊即高陽氏傳二十世三百五十歲次帝嚳即高辛氏傳十世四百歲此康成所据以紬本紀而予亦深信不疑者也黃帝壽三百歲後九世合得千二百二十年或亦有之或一千字爲衍文闕疑可也康成信緯書莫失於六天之說謂天皇大帝等俱有名字而後世乃十載遵用莫得於帝王世數之說而後世絕無信從者以此知人心不同衆言淆亂而好學深思者之寡也陳壽蜀志稱秦宓見帝系之文著論以明其不然今其書不傳而禮記疏中載孫炎駁王肅聖證論文多散佚予乃彙合傳以已意作五帝世系辨其餘如正蘇明允太玄論駁蘇子繇洪範五事說辨李翱五本經縱橫浩汗不下數萬言而謂太玄可以不作欲追廢桓譚張衡于千載之上吾未之敢許也仲恭論經學于近代少可惟推武林卓爾康十五國風論以爲通儒爾康勸仲恭著書垂後仲恭復之曰古人之書汗牛充棟吾輩雖勤學者尚不能十窺二三況吾輩之才學遠不逮古

人而復之學者其勤又未必及吾輩縱復有患施之五車其誰傳之又曰春秋以前作者之事備矣雖有聖人但述而不作宋元以來述者之事備矣雖有志士但當調而不述爾康無以難也慈谿馮公元颺按部海虞造門修謁請所著書仲恭亦以斯言謝焉晚而語余吾欲將十三經諸子墜言滯義標舉數則勒成一書竊比於程大昌演繁露王伯厚困學紀聞庶幾可以謝諸公及吾子矣易簣之前繕寫所焚詩經禮記莊子俾其子屬余今所傳炳燭齋隨筆是也仲恭自負才敏傑然有志於當世衰晚病廢志意約結作爲文章以自慰諭嘉定程孟陽稱之曰李文饒之流也作竹籥傳曰竹氏之興蓋顯于禹益之世至周浸盛有名策者與端木氏之名方者齊名並以強識聞方專史職而策好博小物爲人修直無頗帝命與投鉤氏互司利事市民之分貨財不平者咸質厥成又善事鬼神降言必憑焉巫覡莫及也其族初在遼西今支齊桓公伐山戎斬孤竹乃遷中土漢帝將立后未定侍臣請決之策帝不能用晉武卽位問世